



# Didim-pitsarana momba ny ady

## ara-barotra

RAHARAHA Lah. : 255/16

RC : 856/16

DIDIM-PITSARANA NIFANATREHANA

DIDY Lah. : 085-C

TAMIN'NY 14 APRILY 2017

FIANTSOANA VOALOHANY : 28 OKTOBRA 2016

FAHARETAN'NY FITSARANA : 5Volana 17Andro

Mpitsara : Andriamatoa RAZAFINDRAKOTO Rivoniaina - FILOHA-  
Andriamatoa RAZAFIARISON  
Andriamatoa RASOLOARIMANANA Tsilavina  
-MPITSARA MPANAMPY-  
Natrehin'i Me RAHARISON Rova - MPIRAKIDRAHARAHA -

Ny Fitsarana ampahibemaso momba ny ady ara-barotra eto Antananarivo tao amin'ny lapan'ny fitsarana ao an-toerana, ao amin'ny efitrano fitsarany andavanandro, tamin'ny zoma efatra ambin'ny folo aprily taona fito ambin'ny folo sy roa arivo,

Dia namoaka izao didy izao :

Teo amin' ny :

*Compagnie Malgache des Caoutchou SA (COMACAT)*, ao lalana Ravoninahitriniarivo, Immeuble COMACAT Ankorondrano, BP 859 Antananarivo ;

Mpangataka nitranga sy nanao fehin-teny;

Sy

*Fiara Service Company* ao amin'ny logt 441 cité des 67Ha Sud Antananarivo;  
Toriana nitranga sy nanao fehin-teny;

### **NY FITSARANA**

Rehefa hita ny antontan-taratasin'ady :

Re ny mpangataka tamin'ny fangatahany, ny zava-kendrenyary ny fehin-teniny;

Re ny toriana tamin'ny fiarovan-tenany, ny zava-kendreny ary ny fehin-teniny ;

Ary rehefa nidinika araka ny lalàna ;

Araka ny taratasy fampidiran-draharaha eto amin'ny fitsarana, natao tamin'ny alalan'ny taratsin'ny Vaditany tamin'ny 13 oktobra 2016, ny orinasa Compagnie Malgache des Caoutchouc SA (COMACAT), dia nampiantso ny FIARA SERVICE COMPANY, izay tantanan'ANDRIAMADY Nirina Herilala, hiseho fitsarana ady momba ny raharaham-barotra etoana mba handre :

- Didiana ny orinasa FIARA SERVICE COMPANY, izay tantanan'ANDRIAMADY Nirina Herilala, handoa amin'ny orinasa COMACAT SA vola mitentina 5 138 935 Ar renivola, ankoatra ny zana-bola ara-dalàna ;
- Didiana ny toriana handoa amin'ny mpitory onitra mitentina 2 000 000 Ar ;
- Didiana ny fanatanterahana vonjimaika ny didy izay hivoaka ;
- Apetraka ho andraikity ny toriana ny lany amin'ny fitsarana.

Ny orinasa COMACAT SA dia mitondra izao fanazavana manaraka izao :

Ny orinasa FIARA SERVICE COMPANY dia hananany trosa mitentina 5 138 935 Ar, kanefa hatrizao dia tsy mbola nandoa hafa-tsy 244 571 Ar, na dia teo aty ny fitakiana natao araka ny taratasin'ny vaditany tamin'ny 24 novambra 2015, ka izany dia nitera-pahavoazana ho an'ny tompon-trosa ;

Araka ny fehin-teny nataony, ANDRIAMADY Nirina Herilala dia manaiky fa hananan'ny orinasa COMACAT vola mitentina 5 138 935 Ar, ka ny 244 571 Ar no efa voalao ;

Manaiky izy ny handoa io volan'ny COMACAT io ;

Nilaza koa izy fa nametraka ny fiarany tany amin'ny COMACAT mba hizahavana mpividy handoavana ny trosa, kanefa dia tsy lafo io fiara io, ary dia nanjavona ihany koa ny « pare-chocs » ny fiara ;

Ankoatra izay dia nisy kodiarana nalefa natao rechapage tany amin'ny COMACAT, kanefa dia tsy naveriny ;

Noho izany dia mangataka izy ny hanala ny vidin'ny pare-chocs sy ny vidin'ireo kodiarana ireo amin'ny trosa tokony haloany amin'ny COMACAT ;

### **ADY HEVITRA**

**Mikasika ny fangatahana fandoavana vola mitentina 5 138 935 Ar renivola :**

Ny orinasa FIARA SERVICE COMPANY, izay tantanan'ANDRIAMADY Nirina Herilala, dia manaiky ny trosa 5 138 935 Ar izay ananan'ny orinasa COMACAT aminy ary manaiky ny handoa io vola io, koa dia raisina izany hilazana fa mitombona ny fangatahana ary omena rariny ;

Tsara marihana fa manana zo ny orinasa FIARA SERVICE COMPANY, izay tantanan'ANDRIAMADY Nirina Herilala, hitaky izay heveriny fa zony mikasika ny pare-chocs sy kodiarana any amin'ny COMACAT, saingy tsy afaka alana avy hatrany amin'ny trosany etoana izany.

**Mikasika ny fangatahana onitra :**

Tsy azo lavina fa tara ny fandoavan'ny FIARA SERVICE COMPANY, izay tantanan'ANDRIAMADY Nirina Herilala, ny trosan'ny COMACAT, koa dia mari-pototra ny fangatahana onitra noho izany fahatarana izany, araka izay voalazan'ny andininy faha 193 amin'ny lalàna laharana faha 66 003 tamin'ny 2 jolay 1966 mikasika ny fepetra ankapoben'ny andraikitra (loi sur la théorie générale des obligations) ;

Miho-papana anefa ny mari-bola angatahana raha oharina amin'ny trosa sy ny fahatarana, koa dia ferana 500 000 Ar ny fanonerana ara-drariny ny fahavoazanan'ny orinasa COMACAT ary dia didiana ny FIARA SERVICE COMPANY handoa aminy io vola io ho onitra.

**Mikasika ny fangatahana fanatanterahana vonjimaika :**

Tsy voamarina ny fisian'ny hamehana amin'izao raharaha izao, koa dia lavina ny fangatahana fanatanterahana vonjimaika.

## **Hojo ireo antony ireo**

Mitsara ampahibemaso, nifandaharana, amin'ny lafiny ady mikasika ny raharaham-barotra ary azo anaovana fampakarana fitsarana ambony ;

Didiana ny orinasa FIARA SERVICE COMPANY, izay tantanan'ANDRIAMADY Nirina Herilala, handoa amin'ny orinasa COMACAT SA vola mitentina 5 138 935 Ar renivola, ankoatra ny zana-bola ara-dalàna ;

Didiana ny toriana handoa amin'ny mpitory onitra mitentina 500 000 Ar ;

Ambara fa tsy misy ny fanatanterahana vonjimaika izao didy izao ;

Apetraka ho andraikity ny toriana ny lany amin'ny fitsarana ;

Dia toy izany no nitsarana ampahibemaso sy namoahana ity didim-pitsarana ity tamin'ireo andro, volana ary taona voalaza etsy ambony. Ary ny matoan'ity didy ity, rehefa avy novakiana, dia nosoniavin'ny FILOHA sy ny MPIRAKIDRAHARAHANA.